






3
















Lettres Patentes du

ROY, SVR LES LEVEES
& impositions de deniers qui se font
par ceux de la Religion pretenduë re-
formée sur ses suiëcts; Declarant tant
ceux qui ont ordonné cydeuant & or-
donneront cy apres lesdites leuées,
que ceux qui en feront la recepte &
y contribueront; criminels de leze
Majesté, & perturbateurs du repos
publicq.

*Veriffiée en Parlement, le vingt-deuxiesme
Feurier mil six cens vingt vn.*



A ORLEANS,

Par FABIAN, & SATVRNIN les HOTOTS,
Imprimeurs ordinaires du Roy.

M. DC XXI.

Avec Permission de sa Majesté.

Case

F

39

.326

1621 fLe

THE NEWBERRY
LIBRARY



L OVIS par la grace de Dieu
Roy de France & de Nauarre,
A tous ceux qui ces presentes
lettres verront, Salut. Entre
les licences & desordres qui se commet-
tent en plusieurs endroits de nostre
Royaume, contre le bien de nostre ser-
uice, & la manutention de nostre aucto-
rité par nos subjects de la Religion pre-
tendue reformée, nous sommes aduertis
que de leur auctorité, il se faiet en diuers
lieux des impositions, collectes & cotti-
sations de deniers qui s'exigent sur nos
subjects, tant par violence & contrain-
cte que par pertuations & intimidations
pour iceux employer en mauuais effects,
contre le bien de nostre seruice & la tran-
quillité publique. Et d'autant que sem-
blables leuées de deniers sont contraires
aux loix & constitutions de ce Royau-
me, preiudiciables à nostre auctorité &

A ij.

au repos de nos subjects: A ces causes &
 autres bonnes & importantes conside-
 rations à ce nous mouuans, Nous auons
 faict & faisons tres-expresses inhibitions
 & defences à toutes personnes de quel-
 que qualité & condition qu'ils soient,
 de faire aucunes leuées, impositions,
 Collectes & cottisations de deniers sur
 nos subjects, pour quelque cause & pre-
 texte que ce soit, sans nos Commissions
 expresses, scelees de nostre grand sceau,
 & par l'ordre de nos Officiers ordina-
 res, & à tous nos subjects d'en payer au-
 cune chose: Declarant tous ceux qui ont
 ordonné cy-deuant, & ordonneront cy-
 apres desdites Collectes & cottisations,
 Ensemble ceux qui en feront la recepte,
 & ceux qui payeront & contribueront à
 semblables leuées & Collectes, criminels
 de leze Majesté, & perturbateurs du re-
 pos public: Et en ceste qualité nous vou-
 lons qu'il soit procedé contre eux par
 toutes voyes & rigeurs de Iustice, suiuant
 les Loix & Ordonnances: Comme aussi
 nous voulons que s'il y auoit à present
 quelques deniers es mains de quelques

5

uns, ils ayent à les porter dans la recepte generale ou particuliere des Tailles, qui sera plus proche, dans huict iours apres la publication des presentes, En quoy faisant ils en demeureront deschargez.

Si donnons en mandement à nos amez & feaux les gens tenans nos Cours de Parlement, & Chambre del'Edict, Que ces presentes ils facent lire, publier, registrer, & le contenu en icelles, garder & obseruer exactement chacun endroict soy: Enjoignons à nos Procureurs Generaux en nosdites Cours, & leurs Substituts d'y tenir soigneusement la main, & faire toutes poursuites & requisitions pour ce necessaires. Car tel est nostre plaisir En tesmoin de quoy nous auons faict mettre nostre scel à cesdites presentes. Donné à Paris le quatorziesme iour de Feurier, l'an de grace mil six cens vingt vn.

Et de nostre regne le vnziesme.

Signé,

LOVIS.

Et sur le reply, Par le Roy,

DE LOMENIE.

Et scellées du grand sceau de cire jaune

sur double queue.

Et sur ledit reply est encore escrit,

*Leues, publiées, & registrées, oy & ce
requerant le Procureur General du
Roy, Et ordonne que coppies collationnées
seront enuoyées aux Bailliages & Senes-
chaussées, pour y estre leues, publiées &
executées à la diligence des Substituts
du Procureur General du Roy, auxquels
enjoint la Cour la certifier auoir ce fait
au mois. A Paris en Parlement le vingt
deuxiesme Feurier mil six cens vingt-
un.*

Signé, DV TILLET.

A Vjourd'huy vendredy cinquesme
 de Mars Mil six cens vingt vn. Les
 Lettres Patentes du Roy cy-dessus, ont
 esté leuës & publiées a haute voix, par le
 Greffier du Bailliage & Siege Presidial
 d'Orleans, au Siege dudit Bailliage,
 l'Audiance tenant, Par Nous François
 Beauharnois Conseiller du Roy, Presi-
 dent & Lieutenant General audict
 Bailliage & Siege Presidial, assisté des
 Lieutenant Particulier, & Conseillers
 Magistrats, esdits Sieges, en la presence
 & ce requerant le Procureur du Roy
 dont luy auons octroyé acte, & ordonné
 qu'elle sera publiée à son de Trompe &
 cry publicq, par les Carrefours de ceste
 Ville, & registrées és registres du Greffe
 dudit Bailliage pour y auoir recours
 quant besoing sera. & coppies d'icelle
 enuoyées és Iustices Royales & non
 Royales de ce ressort, pour y estre pa-
 reillement leuës & publiées, gardees &
 obseruées, à la requeste des substituds
 du Procureur du Roy esdictes Iustices,
FAICT & Donné Par Nous President
 & Lieutenant General susdit, lesdits
 iour & an.

Signé,

D V H A N.

LE contenu cy-dessus, a esté par moy
Nicolas Lasne Sergent Royal, crieur
ordinaire des bans, cris & proclamati-
ons de ceste Ville d'Orleans, soubz signé,
leuë & publiée à son de Trompe & cry
public, par les Carrefours de ceste Ville
d'Orleans, assisté de Martin Desueignes
Trompette, à ce qu'aucun n'en pretende
cause d'ignorance, le Samedy sixiesme
iour de Mars, mil six cens vint-un.

Signé,

LASNE.